

# Kerajaan akan kaji semula dasar beri subsidi — Mahathir

**K**UALA LUMPUR 25 Ogos — Perdana Menteri Datuk Sri Dr. Mahathir Mohamad berkata kerajaan akan mengkaji semula dasar pemberian subsidi dan bantuan untuk mengikis masyarakat yang berfikiran subsidi dan bergantung kepada kebajikan.

Katanya, kerajaan bercita-cita untuk mewujudkan satu masyarakat Malaysia yang berdikari iaitu satu masyarakat yang tidak sentiasa bergantung kepada kerajaan atau institusi-institusi tertentu.

“Sedikit sebanyak masyarakat kita telah di-manjakan dengan subsidi dan berbagai rupa bentuk

bantuan. Kerajaan secara beransur-ansur akan mengurangkan pemikiran subsidi atau ‘dole-mentality’ ini demi kebaikan masyarakat sendiri,” ujar Perdana Menteri.

Berucap merasmikan Seminar Kebangsaan Kebajikan Masyarakat di Pusat Dagangan Dunia Putra, beliau menyatakan: “Justeru itu, kerajaan telah menegaskan pendiriannya bahawa segala bantuan yang diberikan hanyalah setakat untuk membantu seseorang itu dapat memulakan usaha yang produktif.”

“Ini telah digambarkan melalui sikap kerajaan mengenai subsidi yang se-

belum ini telah dihulurkan kepada para petani, nelayan dan sebahagian daripada penduduk luar bandar,” tambah beliau.

## Sikap

“Sekarang ini bentuk subsidi akan dikaji semula supaya tidak mewujudkan tabiat suka bergantung kepada subsidi di kalangan golongan rakyat kita. Begitu juga dengan sikap kerajaan di sektor-sektor lain, di mana bantuan bukan diberi sehingga seseorang atau golongan rakyat itu menjadi lemah dan bergantung sangat kepada bantu-

an kerajaan,” terang beliau.

Seminar dua hari anjuran Kementerian Kebajikan Masyarakat, Yayasan Kebajikan Negara dan Majlis Kebajikan Masyarakat Kebangsaan itu dihadiri oleh kira-kira 200 ketua masyarakat dan kebajikan dari seluruh negara.

Turut hadir ialah isteri Perdana Menteri, Datuk Sri Datin Paduka Dr. Siti Hasmah Mohd. Ali, Menteri Kebajikan Masyarakat, Datuk Shahrir Abdul Samad dan Menteri Wilayah Persekutuan, Datuk Abu Hassan Omar.

Dalam sektor kebajikan, Datuk Sri Dr. Mahathir

mahukan rakyat negara ini menghargai sistem berke-luarga besar (extended family) dengan melakukan kerja-kerja memelihara dan merawat ahli-ahli keluarga yang tidak bernasib baik dan tidak melepaskannya semata-mata kepada kerajaan dan pertubuhan kebajikan.

“Keluarga tidak boleh melepaskan tangan dan berharap kerajaan atau pertubuhan kebajikan sahaja berusaha memberi pertolongan. Sementara kerajaan dan pertubuhan kebajikan boleh memberi bantuan, mereka tidak boleh memberi kasih sayang seperti yang didorong oleh kekeluargaan,” ujar Perdana Menteri.

“Sementara yang cacat ini perlu diberi bantuan, kita harus ingat bahawa sebagai orang Timur, kita masih menghargai sistem berke-luarga besar,” tegasnya.

“Janganlah kita ketepi dan lupakan mereka apabila sahaja mereka mendapat pertolongan orang lain,” tambah beliau.

Untuk aktiviti-aktiviti dan program kebajikan masyarakat pula, tambah Datuk Sri Dr. Mahathir, kerajaan tidak menggalakkan bantuan dihulurkan sehingga menjadikan seseorang itu bergantung kepada bantuan kerajaan untuk meneruskan hidupnya pada masa depan.